

**VENDIM**  
**Nr. 123, datë 21.7.2016**

**MBI MIRATIMIN E LICENCËS PËR VEPRIMTARINË E OPERIMIT TË TREGUT  
TË ENERGJISË ELEKTRIKE**

Në mbështetje të neneve 16; 37, pika 2, germa “dh”; 38 të ligjit nr. 43/2015, “Për sektorin e energjisë elektrike” dhe nenit 26 të “Rregullores së organizimit, funksionimit dhe procedurave të ERE-s”, miratuar me vendimin e Bordit të ERE-s nr. 96, datë 17.6.2016, Bordi i ERE-s, në mbledhjen e tij të datës 21.7.2016, mbasi shqyrtoi relacionin e përgatitur nga drejtoritë teknike, për miratimin e licencës për veprimtarinë e operimit të tregut të energjisë elektrike dhe draftin përkatës,

konstatoi se:

- Me vendimin nr. 4, datë 27.1.2016, Bordi i ERE-s ka miratuar fillimin e procedurës për miratimin e licencës për veprimtarinë e operimit të tregut të energjisë elektrike.
  - Në lidhje me këtë licencë është kryer edhe procesi i konsultimit me palët e interesit.
- Për gjithë sa më sipër cituar, Bordi i ERE-s

**VENDOSI:**

- Të miratojë licencën për veprimtarinë e operimit të tregut të energjisë elektrike (licenca e operimit të tregut bashkëlidhur këtij vendimi).
  - Drejtoria Juridike dhe e Mbrojtjes së Konsumatorit të njoftojë palët e interesuara për vendimin e Bordit të ERE-s.
- Ky vendim hyn në fuqi menjëherë.  
Ky vendim botohet në Fletoren Zyrtare.

**KRYETARI**  
**Petrit Ahmeti**

**REPUBLIKA E SHQIPËRISË**  
**ENTI RREGULLATOR I ENERGJISË**

**LICENCË**

**PËR VEPRIMTARINË E OPERATORIT TË TREGUT TË ENERGJISË ELEKTRIKE**

Numri i licencës:

Certifikata e regjistrimit:

Seria:

Data e hyrjes në fuqi:

Licenca i jepet:

Shoqëria:

NUIS:

Bazuar në autoritetin që i është dhënë në seksionin II të pjesës së pestë, të ligjit nr. 43/2015, “Për sektorin e energjisë elektrike”, Enti Rregullator i Energjisë (ERE) i jep këtë licencë (licenca), për të kryer veprimtarinë e operatorit të tregut të energjisë elektrike (TEE), personit të lartpërmendur, i quajtur “i licencuari”, subjekt i kushteve të licencës të bashkangjitura dhe pjesë integrale të saj, si dhe kushteve të përcaktuara në vendimin e Bordit të ERE-s.

Kjo licencë hyn në fuqi në datën e shkruar më lart dhe do të vazhdojë të jetë në fuqi, deri në përfundim të afatit të kësaj licence ose hiqet nga ERE në përputhje me kushtet e licencës të përfshira këtu.

**KRYETAR I ERE-s**

## KUSHTET E LICENCËS

### PËR VEPRIMTARINË E OPERATORIT TË TREGUT TË ENERGJISË ELEKTRIKE

Seria: \_\_\_\_\_

Numri i licencës: \_\_\_\_\_

I jepet: \_\_\_\_\_

(emri i plotë i të licencuarit)

#### 1. Dispozita të përgjithshme

1.1 ERE është autoriteti i vetëm në Republikën e Shqipërisë, i njohur në seksionin II, të pjesës së pestë, të ligjit nr. 43/2015, “Për sektorin e energjisë elektrike”, për të lëshuar dhe për të deklaruar hyrjen në fuqi të kësaj licence.

1.2 Nëse ndonjë kusht i kësaj licence bëhet nul ose i anulueshëm apo pushon së qeni në fuqi, ky kusht do të hiqet nga licenca dhe kushtet e mbetura të licencës do të vazhdojnë të jenë plotësisht në fuqi.

1.3 ERE ka të drejtën ekskluzive për të ndryshuar këtë licencë, në rast se kushtet dhe rrethanat kanë ndryshuar, si dhe për të përmbushur dispozitat e rregullave të tregut, Kodit të Rrjetit, Kodi të Shpërndarjes, Kodit të Matjes të miratuara nga ERE sipas legjislacionit në fuqi.

1.4 Në Republikën e Shqipërisë do të jepet vetëm një licencë për aktivitetin e Operatorit të Tregut të Energjisë Elektrike.

1.5 Fjalët dhe frazat e mëposhtme të përdorura në licencë, kushtet e licencës dhe anekset, kur përdoren, do të kenë kuptimet e mëposhtme:

“Enti Rregullator i Energjisë” ose “ERE” është institucioni rregullator i sektorit të energjisë elektrike dhe gazit natyror, i cili funksionon në përputhje me ligjin 43/2015, “Për sektorin e energjisë elektrike” dhe ligjin nr. 102/2015, “Për sektorin e gazit natyror”.

“Operimi i tregut” është veprimtaria që kryen operatori i tregut lidhur me menaxhimin e tregut të energjisë elektrike dhe përgatitjen e raporteve financiare për pjesëmarrësit e tregut, pa përfshirë blerjen apo shitjen e energjisë elektrike, në përputhje me parashikimet e rregullave të tregut.

“Operatori i tregut” është struktura përgjegjëse e licencuar për operimin, organizimin dhe menaxhimin e tregut të energjisë elektrike.

“Aktivitete të energjisë elektrike” janë aktivitete ekonomike që lidhen me prodhimin, transmetimin, shpërndarjen dhe furnizimin e energjisë elektrike, si dhe funksionimin e tregut të energjisë elektrike.

“Bordi” është organi vendimmarrës i ERE-s, i emëruar sipas ligjit të cituar me sipër.

“Dispeçerimi” është veprimtaria e kryer nga Operatori i Sistemit të Transmetimit, që konsiston në menaxhimin në kohë reale të flukseve të energjisë elektrike dhe zbatimin e masave të nevojshme për operimin e bashkërenduar të komponentëve të sistemit elektroenergjetik, përfshirë centralet prodhuese, rrjetin e transmetimit dhe shërbimet ndihmëse të nevojshme për operimin e sistemit.

“Licencë” është një e drejtë që i jepet një personi për ushtrimin e një veprimtarie në sektorin e energjisë elektrike, në përputhje me dispozitat e këtij ligji.

“Ligji”, në këtë akt, do të kuptohet në çdo rast ligji nr. 43/2015, “Për sektorin e energjisë elektrike”.

“Legjislacioni në fuqi” janë ligjet e Republikës së Shqipërisë të miratuara nga Kuvendi i Shqipërisë, dhe aktet e tjera nënligjore të miratuara nga ERE apo organet e tjera të ngarkuara me ligj.

“Modeli i tregut të energjisë elektrike” është një dokument i përgatitur dhe i miratuar në përputhje me dispozitat e ligjit, i cili përcakton marrëdhëniet ndërmjet pjesëmarrësve të ndryshëm të tregut të energjisë elektrike.

“Rregullat e tregut” janë rregulla të hollësishme, të cilat përcaktojnë mënyrën e operimit dhe të menaxhimit të tregut, regjistrimin e pjesëmarrësve, përgjegjësinë e balancimit prej

pjesëmarrësve të tregut të energjisë elektrike, rregullat për balancimin e sistemit të energjisë elektrike, rregullat për llogaritjen e disbalancës për palët përgjegjëse të balancimit, rregullat për përgjegjësitë financiare të palëve përgjegjëse të balancimit në rast të disbalancimit, si dhe çështje të tjera lidhur me funksionimin e tregut.

“Eksport” është dispeçerimi i energjisë elektrike që i korrespondon sasisë së energjisë elektrike që livrohet njëkohësisht në një vend tjetër si import i deklaruar mbi bazën e një marrëdhënieje kontraktuale.

“ENTSO-e (*European Network of Transmission System Operators for Electricity*)” është Rrjeti Evropian i Operatorëve të Sistemit të Transmetimit të Energjisë Elektrike.

“I licencuar” është një person i pajisur me licencë për aktivitete të energjisë elektrike, në përputhje me dispozitat e ligjit.

“Operatori Sistemit të Shpërndarjes” ose “OSSH” është një person juridik, përgjegjës për operimin e sigurt, të besueshëm dhe të efektshëm të rrjetit të shpërndarjes, duke siguruar mirëmbajtjen dhe zhvillimin e sistemit të shpërndarjes, të shtrirë në një zonë të caktuar dhe kur është e aplikueshme, lidhjet e tij me sisteme të tjera për të siguruar aftësi afatgjatë të sistemit për të përmbushur kërkesat e arsyeshme për shpërndarjen e energjisë elektrike, në harmoni me mjedisin dhe eficiencën e energjisë.

“Operator i Sistemit të Transmetimit” ose “OST” është personi juridik, përgjegjës për operimin, mirëmbajtjen dhe zhvillimin e sistemit të transmetimit, duke përfshirë interkonjeksionet me sistemet e tjera ndërkufitare, për të siguruar aftësinë afatgjatë të sistemit për plotësimin e kërkesave të arsyeshme për transmetimin e energjisë elektrike.

“Operator i rrjetit” është operatori i sistemit të transmetimit dhe/ose operatori i sistemit të shpërndarjes së energjisë elektrike.

“Pala përgjegjëse për balancimin” është një pjesëmarrës i tregut të energjisë elektrike ose përfaqësuesi i zgjedhur prej tij, përgjegjës përballë Operatorit të Sistemit të Transmetimit për disbalancat e krijuara gjatë operimit të tij.

“Palët e Komunitetit të Energjisë” janë palët kontraktuese të Traktatit të Komunitetit të Energjisë, Bashkimi Evropian dhe shtetet anëtare të tij.

“Person” është një person fizik ose juridik.

“Përdoruesit e sistemit” janë personat fizikë ose juridikë, të cilët i furnizon ose furnizohen me energji elektrike nëpërmjet sistemit të transmetimit ose të shpërndarjes.

“Pjesëmarrës i tregut të energjisë elektrike” është një person juridik, i regjistruar si pjesëtar i tregut të energjisë elektrike, që përfshin: prodhuesit, tregtarët, furnizuesit, klientët, Operatorin e Sistemit të Transmetimit, Operatorin e Sistemit të Shpërndarjes, sistemet e mbyllura të shpërndarjes dhe operatorin e tregut. Operatori i Sistemit të Transmetimit dhe Operatori i Sistemit të Shpërndarjes janë pjesëmarrës të tregut të energjisë elektrike vetëm për qëllim të sigurimit të energjisë elektrike të nevojshme për mbulimin e humbjeve në rrjet, balancimin dhe shërbimet ndihmëse.

“Kodet e rrjetit” janë Kodi i Transmetimit dhe Kodi i Shpërndarjes.

“Kodi i shpërndarjes” është tërësia e rregullave teknike, të cilat rregullojnë funksionimin e rrjetit të shpërndarjes, si dhe vendosin kushtet e shërbimit që ofrohen nga operatorët e sistemit të shpërndarjes për përdoruesit e sistemit të shpërndarjes.

“Kodi i transmetimit” është tërësia e rregullave teknike, të cilat rregullojnë operimin e sistemit të transmetimit, si dhe përcaktojnë kushtet e shërbimit që ofrohen nga Operatori i Sistemit të Transmetimit ndaj përdoruesve të sistemit të transmetimit, në përputhje me rregullat e ENTSO-e.

“Kodi i Matjes” është tërësia e normave minimale të detyrueshme për matjen dhe regjistrimin e energjisë elektrike.

“Sistemi i energjisë elektrike” është një sistem i ndërlidhur, i përbërë nga centralet elektrike, linjat elektrike, nënstacionet dhe pajisjet e transmetimit e shpërndarjes, me qëllim transmetimin apo shpërndarjen e energjisë elektrike te klientët.

“Sistemi i shpërndarjes” është sistemi i linjave, strukturave mbështetëse, pajisjeve transformuese dhe kyçëse/shkyçëse, të përdorura për shpërndarjen e energjisë elektrike dhe livrimin e saj te klientët fundorë.

“Sistemi i transmetimit” është sistemi i përdorur për transmetimin e energjisë elektrike në tension të lartë dhe shumë të lartë, i lidhur në paralel me sistemet e vendeve të tjera, që përfshin midis të tjerave linjat, strukturat mbështetëse, pajisjet transformuese dhe kyçëse/shkyçëse për livrimin e energjisë elektrike te klientët ose në rrjetin e shpërndarjes, pa përfshirë furnizimin.

“Shërbime ndihmëse” janë shërbimet e nevojshme për operimin e qëndrueshëm të sistemit të transmetimit ose të shpërndarjes.

“Shoqëri elektroenergjetike” është një person fizik ose juridik që kryen të paktën një nga veprimtaritë: prodhim, transmetim, shpërndarje, furnizim ose blerje të energjisë elektrike, i cili është përgjegjës për detyrimet tregtare, teknike ose të mirëmbajtjes, lidhur me këto veprimtari, pa përfshirë klientët fundorë.

“Shpërndarje” është transporti i energjisë elektrike në sistemin e shpërndarjes me tension të lartë, të mesëm dhe të ulët, me qëllim livrimin e saj te klientët fundorë, pa përfshirë furnizimin.

“Transit i deklaruar” është sasia e energjisë elektrike që vjen nga një vend tjetër, e cila nuk konsumohet në vend, por kalon në një vend të tretë.

“Tregu i organizuar i energjisë elektrike” është platforma e organizuar për shitjen dhe blerjen e energjisë elektrike në bazë të ditës në avancë dhe/ose brenda së njëjtës ditë.

“Tregu i energjisë elektrike” është një sistem ku kryhen shitje dhe blerje efektive, përfshirë edhe derivativët e energjisë elektrike, nëpërmjet kërkesave dhe ofertave, të paraqitura në periudha afatgjata dhe afatshkurtra.

“Tregtar” është çdo person juridik, i cili kryen veprimtarinë e tregimit të energjisë elektrike.

“Tregtimi i energjisë elektrike” është procesi që kryhet nga një person juridik që blen energji elektrike, me qëllim rishitjen e saj brenda ose jashtë sistemit të vendit ku kryen veprimtarinë.

“Forcë madhore” është një akt ose ngjarje natyrore apo shoqërore, si: tërmetet, rrufetë, ciklonet, përmytjet, shpërthimet vullkanike, zjarret ose luftërat, konfliktet e armatosura, kryengritjet, veprime terroriste ose ushtarake, të cilat pengojnë të licencuarin të përmbushë detyrimet e tij sipas licencës, si dhe akte apo ngjarje të tjera që janë përtej kontrollit të arsyeshëm dhe që nuk kanë ardhur për faj të të licencuarit dhe i licencuari nuk ka pasur mundësi të shmangë një akt ose ngjarje të tillë nëpërmjet ushtrimit të vullnetit, përpjekjeve, aftësive dhe kujdesit të tij të arsyeshëm.

“Biznesi shoqërues”, çdo biznes që direkt ose indirekt, tërësisht ose pjesërisht:

- a) është pronë e të licencuarit; ose
- b) ka të licencuarin në pronësi; ose
- c) është në pronësi të personit, i cili është pronë e të licencuarit.

“Ndërsuvencionimet”, transferim fondesh ose ndarje kostosh brenda llogarive të të licencuarit ose mes bizneseve shoqëruese për mbështetje financiare të një aktiviteti ose biznesi me koston e një tjetri.

## 2. Kryerja e aktivitetit të licencuar

2.1 I licencuari autorizohet nga kjo licencë për të zhvilluar aktivitetin e operatorit të tregut të energjisë elektrike në Republikën e Shqipërisë. Kjo e drejtë i jepet ekskluzivisht të licencuarit.

2.2 I licencuari nuk do të vendosë pagesa, përveç atyre të aprovuara nga ERE, herë pas here, sipas legjislacionit në fuqi dhe rregulloreve dhe rregullave të ERE-s. I licencuari, në përputhje me rregullat e tregut, është i autorizuar që të kryejë aktivitetet, si vijon:

- të administrojë rregullat e tregut të energjisë elektrike;
- të mbajë proces transparent për alokimin e kapaciteteve;
- të zbatojë procedurat e regjistrimit në tregun e energjisë elektrike;
- të zbatojë rregullat për garancitë financiare të pjesëmarrësve për regjistrimin në tregun e energjisë elektrike;

- të administroje dhe të mirëmbajë IT-në;
- të mbajë llogari transparente për operatorin e tregut, si dhe të pjesëmarrësve në tregun e energjisë elektrike;

- të faturojë detyrimet financiare ndaj operatorit të tregut; si dhe
- të gjitha detyrimet që rrjedhin nga rregullat e tregut;

2.3 I licencuari nuk do të pengojë, do të parandalojë ose të tentojë të parandalojë të licencuarit e tjerë ose pjesëmarrësit potencialë ose konkurrentët që të angazhohen ose, të hyjnë:

- a) në biznesin e aktiviteteve në sektorin e energjisë elektrike në Republikën e Shqipërisë; ose
- b) në biznesin e importimit ose eksportimit të energjisë elektrike në ose nga Republika e Shqipërisë, me përjashtim kur i licencuari udhëzohet ndryshe nga legjislacioni në fuqi.

2.4 I licencuari nuk do të angazhohet në ndërsbvencionime. Nëse i licencuari është një kompani vertikalisht e integruar elektroenergjetike, do t'i ndajë llogaritë e tij financiare sipas aktiviteteve të gjenerimit, transmetimit dhe shpërndarjes, brenda afatit të kërkuar nga legjislacioni në fuqi, në mënyrë të mjaftueshme për të mundësuar që ERE të konkludojë se nuk ka ndërsbvencionime, aktivitete antikonkurrence ose diskriminim.

2.5 I licencuari nuk do të angazhohet në asnjë formë aktiviteti monopol ose antikonkurrence të ndaluar nga legjislacioni në fuqi ose rregulloret dhe rregullat e miratuara nga ERE.

2.6 Brenda datës 15 shkurt të çdo viti, i licencuari do t'i dërgojë ERE-s një informacion për kryerjen e aktivitetit gjatë vitit paraardhës dhe përmbushjes së kuadrit ligjor në sektorin e energjisë elektrike, deklaratë me shkrim, në formën e specifikuar nga ERE.

2.7 I licencuari nuk do të bashkëpunojë me persona të tjerë për të dëmtuar të licencuarit ose konsumatorët e përfshirë në sistemin elektroenergjetik.

2.8 I licencuari do ta kryejë aktivitetin e licencuar në përputhje me parimet e transparencës.

2.9 I licencuari nuk do të angazhohet në aktivitete të tjera që pengojnë ose mund të pengojnë kryerjen e aktivitetit të licencuar. I licencuari duhet të informojë ERE-n në rastet, kur synon të:

- a) angazhohet në aktivitet tjetër përveç aktivitetit të licencuar; ose
- b) të ngrejë një biznes shoqërues.

2.10 I licencuari do të informojë ERE-n për ngritjen e çdo biznesi shoqërues. ERE mund ta ndalojë ose të vendosë kushte të veçanta për ngritjen e bizneseve shoqëruese të nevojshme për të mbrojtur interesat e konsumatorëve.

2.11 I licencuari është i autorizuar të vendosë pagesa të aprovuara nga ERE.

2.12 I licencuari nuk është përgjegjës për mospërmbushjen e kushteve të licencës në rast të një force madhore deri në atë shkallë sa force madhore është shkaku për këtë mospërmbushje të kushteve të licencës. Në këtë rast, i licencuari duhet të njoftojë menjëherë ERE-n dhe të licencuarit e tjerë ose konsumatorët me të cilët i licencuari ka lidhur marrëveshje.

### 3. Detyrimet e të licencuarit

#### 3.1 Ligji i zbatueshëm

3.1.1 I licencuari është i detyruar të zbatojë legjislacionin në fuqi dhe të gjitha vendimet e Këshillit të Ministrave dhe rregulloret e rregullat e miratuara nga ERE.

#### 3.2 Llogaritë dhe raportimi

3.2.1 I licencuari do të mbajë regjistra llogarie dhe do të përgatisë pasqyra financiare, të cilat do të mbahen të ndara për aktivitetin e licencuar dhe çdo aktivitet tjetër (përfshirë aktivitete të tjera të licencuara) ku është angazhuar i licencuari, në përputhje me rregullat e kontabilitetit dhe procedurat e miratuara nga ERE dhe në përputhje me legjislacionin në fuqi për kontabilitetin. I licencuari do t'i dorëzojë ERE-s pasqyrat financiare vjetore brenda datës 31 janar të çdo viti pasardhës ushtrimor. Të licencuarit, që operojnë në tregun e energjisë elektrike, gjithashtu, janë të detyruar të depozitojnë kopjen e audituar të pasqyrave financiare, brenda datës 30 qershor të vitit pasardhës.

3.2.2 Nëse i licencuari parashikon një situatë emergjence siç përcaktohet nga legjislacioni në fuqi, i licencuari do të njoftojë pa vonesë ERE-n dhe ky njoftim do të përshkruajë çfarë masash do të marrë i licencuari për të parandaluar ose për të përmirësuar ndikimet e situatës emergjente

të parashikuar.

3.2.3 I licencuari do të ndajë shpenzimet e përbashkëta mes aktivitetit të tij të licencuar dhe tipave të tjerë të aktiviteteve (përfshirë aktivitetet e autorizuar nga një i licencuar tjetër), në bazë të arsyeshme në përputhje me rregulloret dhe rregullat e ERE-s dhe praktikën e biznesit, përgjithësisht të pranuar. I licencuari do t'i paraqesë ERE-s, me kërkesën e tij, në formën dhe në afatin e vendosur nga ERE, dokumentacionin që vendos bazat për ndarjen e shpenzimeve të përbashkëta mes aktiviteteve që do të ushtrohen, si dhe rezultatet e arritura pas kësaj ndarjeje.

3.2.4 I licencuari do të njoftojë ERE-n brenda 10 ditëve për çdo ndryshim, të:

- a) adresës;
- b) statutit të të licencuarit;
- c) certifikatës së regjistrimit;
- d) kodit fiskal;
- e) organet kryesore drejtuese;
- f) strukturës së aseteve me mbi 10%.

Nëse i licencuari nuk e bën këtë njoftim, ERE mund të aplikojë gjoka në përputhje me legjislacionin në fuqi.

3.2.5 Të gjitha njoftimet zyrtare, aplikimet, petitionet, pretendimet ose korrespondenca tjetër me ERE-n lidhur me licencën duhet të jetë me shkrim dhe të nënshkruara respektivisht nga një zyrtar i autorizuar ose përfaqësues i caktuar i të licencuarit ose ERE-s dhe të dërgohet me korrier ose postë të regjistruar, duke kërkuar një verifikim të fletës së marrjes. Adresat e palëve duhet të vendosen mbi zarf. Të gjitha njoftimet ose korrespondenca tjetër do të konsiderohen të vlefshme nga momenti i dorëzimit pranë ERE-s. Nëse nuk janë dorëzuar për shkak të gabimit të dërguesit nga momenti i publikimit ato nuk do të merren në evidencë.

3.2.6. I licencuari do të dërgojë në ERE informacion periodik progresiv, me bazë mujore, 4-mujore dhe vjetore:

- i) shpenzimet dhe të ardhurat operative;
- ii) pasqyra *Cash-Flow* (mujore dhe progresive);
- iii) tabela e energjisë së tranzituar, tregtuar (mujore);
- iv) tabela e devijimeve të energjisë kundrejt kontratave (mujore);

#### 4. Pavarësia ligjore dhe administrative

4.1 I licencuari nuk ka të drejtë të jetë i angazhuar në asnjë nga aktivitetet e tjera të sektorit të energjisë elektrike dhe atë të gazit, nëse një gjë të tillë nuk e parashikon legjislacioni në fuqi.

4.2 Personat përgjegjës për menaxhimin e të licencuarit, nuk kanë të drejtë të marrin pjesë në strukturat drejtuese të ndonjë kompanie tjetër në sektorin e energjisë elektrike dhe të gazit.

4.3 I licencuari do të mbajë një faqe zyrtare elektronike.

4.4 I licencuari do të publikojë në faqen zyrtare të gjithë dokumentacionin, përveç atij konfidencial.

4.5 I licencuari nuk do të bëjë diskriminime midis palëve në tregun e energjisë elektrike.

4.6 I licencuari do të veprojë gjithmonë në zbatim të rregullave të tregut në fuqi.

4.7 Çdo propozim nga i licencuari për ndryshim në rregullat e tregut duhet të konsultohet me palët e interesuara.

4.8 I licencuari do të sigurojë pajisje të përshtatshme për kryerjen e aktivitetit të tij, si: *software*, IT, etj. dhe do të publikojë standardet e nevojshme për komunikim, duke u përshtatur me standardet ndërkombëtare dhe në përputhje me rregullat e tregut.

#### 5. Përdorimi i informacionit

5.1 I licencuari do të sigurojë që çdo informacion i marrë si rezultat i aktivitetit të tij të licencuar nuk do t'i jepet askujt, me përjashtim të rasteve, kur:

- a) jepet pëlqim paraprak me shkrim i personit me të cilin lidhet informacioni;
- b) informacioni është bërë publik;
- c) të licencuarit i kërkohet ose i lejohet të përhapë informacionin për të përmbushur kushtet e kësaj licence sipas një urdhri të ERE-s ose çdo dispozite ligjore të aplikueshme;

- d) informacioni duhet përhapur në rrjedhën normale të kryerjes së aktivitetit të licencuar.
- e) parashikohet në legjislacionin në fuqi.

5.2 I licencuari do të sigurojë që çdo biznes shoqërues nuk do të përdorë asnjë informacion të licencuarit për të përfituar një avantazh konkurrues të pajustificuar dhe do të sigurojë që nuk do të përhapë asnjë informacion te ndonjë person tjetër (përfshirë biznese të tjera shoqëruese) që mund ta mundësojnë këtë person të ketë çdolloj përfitimi komercial të pajustificuar.

5.3 I licencuari do të ndërmarrë çdo hap të nevojshëm për ta ruajtur informacionin konfidencial në posedim të të licencuarit dhe për t'i raportuar ERE-s në përputhje me obligimet ligjore.

5.4.1 Informacioni i dërguar ERE-s nga i licencuari do të konsiderohet publik me përjashtim të rasteve, kur me kërkesë specifike të të licencuarit, ERE, me vendim, përcakton që ky informacion është i natyrës pronësore dhe përhapja e tij nuk i shërben interesit publik.

5.5 I licencuari nuk do të hyjë në marrëveshje, të cilat i licencuari, e di ose duhet ta dijë, që çojnë në shkelje të kushteve të licencës.

5.6 I licencuari do të respektojë ligjet dhe vendimet e qeverisë së Republikës së Shqipërisë dhe rregulloret e rregullat e ERE-s.

#### 6. Kontrolli mbi kryerjen e aktivitetit të licencuar

6.1 ERE do të monitorojë zbatimin nga i licencuari të kushteve të licencimit, do të shqyrtojë raportet e marra nga i licencuari dhe është e autorizuar të inspektojë asetet ose regjistrimet e llogarive apo të kërkojë një auditim teknik dhe/ose kontabël të aktiviteteve të të licencuarit. ERE mund të ushtrojë monitorimin ndaj të licencuarit në çdo kohë pas njoftimit me shkrim të këtij të fundit.

6.2 Përfaqësuesit e autorizuar të ERE-s kanë të drejtë të hyjnë në ndërtesat e të licencuarit, të inspektojnë pajisjet dhe dokumentet për aktivitetin e licencuar, në përputhje me rregulloret dhe rregullat e ERE-s. I licencuari do të sigurojë çdo ndihmë të kërkuar, të nevojshme për ERE-n gjatë këtij inspektimi.

6.3 Në bazë të ankesës së vërtetuar të çdo personi të tretë ose me iniciativë të saj, ERE mund të nisë një hetim për zbatimin e kushteve të licencës ose rregulloreve dhe rregullave të ERE-s, përfshirë shqyrtimin e praktikave të biznesit nga të licencuarit lidhur me aktivitetin e licencuar.

6.4 Nëse pas hetimit, ERE konkludon se i licencuari nuk ka zbatuar kushtet e licencës, ERE mund të ndërmarrë masa deri në heqjen e kësaj licence.

6.5 I licencuari do të informojë ERE-n për çdo shkelje të këtyre kushteve të licencës.

6.6 I licencuari do të zbatojë të gjitha vendimet e nxjerra nga ERE, përfshirë pagesën e plotë të gjobave të vendosura nga ERE, në përputhje me rregulloret dhe rregullat e ERE-s, për shkeljen e kushteve të licencës.

#### 7. Amendimi i licencës

7.1 Amendimi i kushteve të kësaj licence bëhet në përputhje me ligjin nr. 43/2015, "Për sektorin e energjisë elektrike" dhe rregulloren e miratuar nga ERE për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike.

7.2 ERE mund të amendojë kushtet e licencës në rastet, si më poshtë:

- a) në bazë të një vendimi gjyqësor të formës së prerë;
- b) me kërkesën e të licencuarit.

7.3 ERE do të marrë vendimin përfundimtar vetëm pasi të marrë në konsideratë interesat e konsumatorëve dhe të licencuarve të tjerë. Palët e interesuara do të informohen me shkrim për çdo amendim të propozuar. Nëse ERE dhe i licencuari arrijnë një marrëveshje për këto amendamente, kushtet e licencës do të amendohen. Nëse marrëveshja nuk arrihet, i licencuari mund të apelojë në Gjykatën Administrative.

7.4 Amendimet e bëra në kushtet e licencës do të publikohen në Fletoren Zyrtare të Republikës së Shqipërisë.

#### 8. Përfundimi dhe heqja e licencës

8.1 Kjo licencë humbet fuqinë me përfundimin e afatit të përcaktuar në vendimin e licencimit.

8.2 ERE mund ta heqë licencën në përputhje me ligjin dhe rregullat e ERE-s, në rastet kur:

- a) i licencuari kërkon revokimin e licencës;
- b) i licencuari shkel kushtet e licencës;
- c) i licencuari shkel legjislacionin në fuqi;
- d) i licencuari deklarohet i falimentuar dhe është i paaftë të përmbushë detyrimet e kushteve të licencës;
- e) i licencuari ka marrë licencë duke mashtruar;
- f) ndodhet para një vendimi gjyqësor të formës së prerë.

8.3. Nëse i licencuari ndryshon statusin e tij ligjor ose aksionari që kontrollon interesat ndryshohet pa autorizimin e ERE-s, licenca bëhet nul (e pavlefshme) ose anulohet dhe pasuesi i të licencuarit mund të aplikojë për një licencë të re, në përputhje me procedurat e ERE-s për dhënie licence.

9. Zgjidhja e mosmarrëveshjeve dhe e drejta për apelim

9.1 Çdo çështje e diskutueshme ose kërkesë mes të licencuarit dhe çdo pjesëmarrësi tregu, do të zgjidhet sa më shpejt që të jetë e mundur, me mirëkuptim, në përputhje me legjislacionin në fuqi dhe rregulloret dhe rregullat e ERE-s.

9.2 Nëse zgjidhja nuk arrihet me mirëkuptim, atëherë, ERE, në bazë të kërkesës së çdo personi që është palë në këtë mosmarrëveshje, do ta zgjidhë mosmarrëveshjen dhe do të nxjerrë vendimin e tij në përputhje me legjislacionin në fuqi, bazuar në rregulloret dhe rregullat e ERE-s.

9.3 I licencuari mund të kundërshtojë vendimet e ERE-s administrativisht apo gjyqësish, sipas parashikimeve të ligjit.

9.4 I licencuari duhet t'u bindet vendimeve të përkohshme të ERE-s në pritje të vendimit të Gjykatës Administrative Tiranë ose të ndonjë gjykate tjetër të Republikës së Shqipërisë me kompetencë juridiksionale.